

An Cath

le Iain Moireastan



'S iom-adh còmhrag streup is stri don chreid-mheach fhior 'tha'n dual tha
naimh-deas if-rean - nail le spid 'ga ruith gach mir dheth 'chuart is buai-ridh-ean bhon
t-slochd as isl' a' lot a chrìdh' gu cruaidh ach bheir e buaidh san ruaig gu crìch fo
bhra-tach chaoimh an Uain

Is iomadh còmhrag streup is stri,
Don chreidmheach fhior 'tha'n dual,
Tha naimhdeas ifreannail le spid,
'Ga ruith gach mir dheth 'chuart,
Is buairidhean bhon t-slochd as isl',
A' lot a chrìdh' gu cruaidh,
Ach bheir e buaidh san ruaig gu crìch,
Fo bhratach chaoimh an Uain.

Is lionmhor cath is gleachd is duaidh,
Is buille bhualadh dhòrn,
Is àmhghar, trioblaid, teinn is truaigh,
Tha dhaibh an dual san fheòil,
Ach armachd Dhé bheir dhaibh a' bhuidh,
'S thig iad an uachdar beò,
'S trid neart an Tì 'rinn sìth dhaibh suas,
Bidh gaisge chruaidh 'nan treòir.

Tha buairidhean a' teachd bhon nàmh,
Air iomadh fàth mun cuairt,
Mar dheuchainn theinnteach 'bhios 'gan cràdh
'S a' toirt dhaibh tàire cruaidh,
Cha nochd e caoimhneas dhaibh no bàigh,
'S gun iochd 'na ghnáths no truas,
Ach chum an dearbhadh anns gach càs,
Bheir iad tre ghràs làn bhuidh.

Nuair 'thig an leómhann beucach, garg,
Le 'shaighdean 's fearg 'na leum,
Bidh 'n còmhrag trom, bidh 'n ionnsaigh garbh,
Bidh gleachd ro shearbh 's gach ceum,
Ach saighdearan 'bhios uallaicht', calm',
Is deas do armachd Dhé,
Bheir dùbhlán dhaibh fon éideadh dearbht',
Gu teich air falbh le beum.

Nuair 'thig feachd Mhidian don tìr,
'S a bhios an crìdh' 'ga chràdh,
Théid Gideon fo airm nach cli,
Is bheir e 'n cinn gu làr,
Air cuirp nam marbh cha tuislich aon,
Ged 'thuitedh daoine sa bhlàr,
'S théid buaidh a' gleachd le feachd nan naomh,
'S lom-sgriosar sgaoth an nàmh.

Nuair 'dh'éireas Belsebub gu garg,
Fo lasan dearg 's le ràs,
Bidh fearas-chlaidheamh ann gu dearbh,
Le iomairt arm gun tàmh,
Thig Criost san eadraiginn gu calm',
'S ann dha nach cearbach làmh,
'S e 'ghràs 'nì feum san éiginn searbh,
Gu toirt nan dealg á sàs.

Bidh 'làmh a ghnáth am measg nan seud,
A thagh e fhéin bhon tòs,
'S iad 'àilleagan dh' an dug e spéis,
'S a dh'ullaich e chum glòir,
'S bheir e á àmhainn àmhghair ghéir,
A-mach gun bheud mar òr,
Gun naomhachadh bho cheum gu ceum,
An iomhaigh Dhé gach lò.

Nuair 'bhios an còmhrag teann le spàirn,
'S a bhios an nàmh fon chaoch,
Bheir Crìost an-sin a ghnùis le fàillt',
'S mín-bhrisear làmh na daors',
'S nì 'n oighreachd aoibhneas ann a shlàint',
Tren Spiorad ghràs-mhor, naomh,
'S tre chreideamh beò, tre dòchas làn,
'S le gràdh gu bràth nach traogh.

Is lionmhor cruth is caochladh dealbh,
San dig an cealgair mór,
Le 'n cuir e cuid 'nan dùsal balbh,
Gun lann no arm 'nan dòrn,
Is labhraidh e le briathran dalm',
"Nis tha sibh marbh fo m' spòig,
Cha dàn dhuibh teich' oir thugadh sealbh,
'Nur cuirp 's 'nur n-anamaibh dhomhs'".

Ach thig an Comhfhurtair 'nan còir,
'Thoirt dhiubh nan còrdan bàis,
Is labhraidh e le briathran fòil,
Gum bheil nas leòr 'na ghràs,
Is séididh orr' an anail bheò,
'S thig mic na h-òige 'n àird,
Is bidh an neart 's an taic fa dheòidh,
Fo bhrataich 's treòir a ghràidh.

Ach thig an nàmh mar aingeal soills',
Is gath na foill' fo 'chleòc,
Is clann na saors' fo neòil na h-oidhch',
'S tha 'n cunnart roinn nas mò,
Gum buail e 'n cogaisean le sgoim,
Gu diteadh dhaibh na còir,
'S bidh feum air solas glan na coinnl',
Gun toirt gu foills' an ròid.

Is iomadh coslas, cruth is snuadh,
San dig e 'bhuaireadh dhaoin',
'Gan cur an dùil 'bhith 'n gràdh don Uan,
'S an saoghal fuaight' 'nan gaol,
'S gu bhith ri gàirdeachas air uair,
Mun adhbhar uaill is caoil',
Le aoibhneas feòlmhor is beag luach,
'S nach mair ach cuairt ro fhaoin.

'Thaobh gur iad oighreachan na slàint',
Dhan dug e gràdh bho chéin,
Bidh aingle Dhé mun cuairt dhiubh 'ghnàth,
'S gach àm cruaidh-chàis no streup,
'S bidh làmh an uachdar ac' gu bràth,
tre fheartan gràidh an Léigh,
A dh'fhuadaicheas air falbh gach plàigh,
Le neart nach fàilnich beum.

'S e 'n tàbhachd e an àm na feum,
Nach fannaich ceum 'na threòir,
Nuair 'thàrlas dhaibh 'bhith anns an t-streup,
'S e 'bheir bhon eug iad beò,
Tha làthaireachd a ghnùis cho sèimh,
'S a ghàirdean treun gu fòir,
Is airm neo-fhàilinneach 'bheir beum,
Don bhéist 'nan déidh 'tha 'n tòir.

Ge lionmhor airc is teinn is daors',
D' a phoball caomh 'tha 'n dàn,
Is caoile 's acras 's tart faraon,
An Crìost cha traogh an sàth,
'S nuair 'thogar suas an altair naomh,
'S a thig an saors' on àird,
'N-sin iobraidh iad an cridh' 's am maoin,
'S théid casg air caoch na plàigh.

Nuair 'bhios tiugh-dhorchadas 's dubh-neul,
Ri folach eudain uath',
Bidh 'n aghaidh ris an ùir gu léir,
'S an inneal theud gun fhuaim,
Thig Grian na fireantachd bho nèamh,
Le slàint' fo 'sgéith gu luath,
'S nì 'n Spiorad Naomh an aonadh réidh,
Ri nàdar Dhé nan sluagh.

Chan aithreadh dhaibhs' an-sin iad fhéin,
'Bhith 'n airc 's an éis gu truagh,
Bidh 'n aiteas àrd airson gun d' éist,
E 'n glaodh 'nan éiginn chruaidh,
'S an crìdhe liont' le aoibhneas réidh,
'S a Ghaisgeach treun 'thug buaidh,
'S le gràdh trid fireantachd làn eud,
'S do 'm pheacadh fhéin làn fuath.

Tha aoibhneas ac' nach léir do dhaoin',
'Tha 'n cuid san t-saoghal chré,
Tha 'n sòlas mór air seòl nach saoil,
'S nach tuig am baoth gun chéill,
'S cha fhàilnich lòn, tha 'n stòr làn maoin,
Am feast nach fhaod dol eug,
Tha 'n tobar làn gu bràth nach traogh,
'S na feadain saor ri 'm beul.

Ged bhiodh na lòcusan 'nan sgaoth,
Air feadh gach raoin is pàirc,
Le 'n crùin mar òr, le eòlas staoin,
'S le còmhradh caoin gun ghràs,
Cha dèanar dochann leo' air aon,
De threud an Aodhair àird,
Oir bheir e fhéin dhaibh léirsinn saor,
A chì 'n droch ghaoid fon èarr.

Tha iad 'n riochd mar eachaibh arm,
'S gnùis dhaoin' a' falbh fo chleòc,
'Nan coslas naomh, le sgleò 'nì 'chealg,
'S le blastachd labhraidh beòil,
Le falt nam 's le deudach garbh,
'S fiamh ciùin ach marbhtach fòp',
'S an earbaill nimheil, geur, le calg,
Nan gath 'tha searbh gu leòn.

Nì iad le 'n sgiathan turbhraich gharbh,
Mar chaismeachd charbad réis,
Tha 'n eòlas cinn, 's an gliocas foirm,
A cumail seirm 'nam beul,
Le bòst á cainnt bho inntinn mhairbh,
Mar ghaoith á balg gun fheum,
Cho seòlt' ri Nimrod gu bhith 'sealg,
'S a' goid air falbh 'n droch éisg.

'N uchd-éididhean mar iarann treun,
Le facal Dhé 'nan ceann,
An cainnt an Sgriobtair iad cho gleust',
'S mu bhrìgh an Sgéil ro dhall,
A' dèanamh dideann dheth 'n deagh-bheus,
'S e togt' air stéidheadh meallt',
'S cùis-thruais na doill a bheir dhaibh géill,
Nach tuig ro mheud am fabht.

Tha 'n aidmheil maiseach le deagh-sgèimh,
'S an crìdh' gu léir làn lùb,
Gun ghràs, gun anail annt' bho nèamh,
Ach lobhte 's e breun 'nan grùnd,
Tha 'n nimh 'nan earbaill 's iomadh beud,
Nach faic an léirsinn sùl,
Tha 'm puinnsean falaicht' orra fhéin,
'S nach faic iad e bho 'n cùl.

Ach dh'aindeoin seòltachd, innleachd 's cealg,
Nan làmh a dhealbh a' bhéist,
Le miodal mìn no ionnsaigh ghairbh,
Cha dèan an armachd beud,
Do phoball saoir' an Uain 'bha marbh,
'S tha beò gu calma, treun,
Tha 'chùmhnant siorraidh dhaibh cho dearbh,
'S gun d' fhuair iad sealbh 'na sheul.